

Despues di añanan di negociacion cu pensioenfond:

WEMA DOÑO DI EDIFICIO BIEU DI VIANA NA BERNARDSTRAAT

ORANJESTAD(AAN): -- WEMA a bira riba 23 di december ultimo, doño di Bernardstraat 101, e edificio caminda e hardware-store tabata situa te 1994.

Asina director di Home & Hardware Center Karel Wever, a bisa den un entrevista cu DIARIO.

Despues di varios aña di negociacion, WEMA a logra

pa cumpra e edificio for di su doño anterior, esta, Pensioenfond di Aruba.

WEMA tin awor, henter e blok di Bernardstraat y Trompstraat, loke tabata antes, di Viana.

Prome cu WEMA tabata aden, Viana tabata tin su showroom y oficina na Bernardstraat, y su garashi y pacus di autoparts na

Trompstraat.

WEMA tabata tin hopi tempo ta spera riba Bernardstraat 101 y awor cu e deal ta rond, a inicia mes ora riba e trabao di reconstruccion.

Algun dia pasa, e compania di construccion a pone un cantidad di stellage rond di e edificio, mientras cu ayera, a cere cu plachinan di zink.

Riba dialuna, lo cuminza cu e trabao.

Den e entrevista cu DIARIO, señor Wever ta conta cu e reconstruccion lo socede den dos fase.

E prome fase ta encera cu Bernardstraat 101 lo wordo drecha y converti den un espacio pa seis pacus.

Tambe, cu ta basha e anterior oficina di Viana abao.

Ta trata aki di e edificio ros na huki di Bernardstraat, cu tin riba dje un borchu cu ta bisa 'Crea'.

Na su lugar, lo bin un edificio di dos piso, masha bunita, asina Karel Wever ta bisa.

WEMA mes tambe, lo tuma parti di e edificio aki, pa su oficina.

Construccion di e edificio di piso lo cay bao di e dos fase di e trabao di reconstruccion, cu ta planea pa ta cla na 1998.

Renovacion di Bernardstraat 101 y eliminacion di e lugar ros mientrastanto, ta cay bao di e prome fase, poni pa ta cla na juni venidero, esta, aki cinco luna.

Director di e cadena di hardware-store ta splica cu pa loke ta basha e edificio ros abao, tin ainda un problema.

Den e lugar bouwval aki, tin hende biba, kendenan tin cu haya un otro cas pa nan bay aden, prome cu por pone

trabao riba e edificio.

E hecho cu señor Wever a cumpli cu su soño pa cumpra Bernardstraat 101, taifica un logro grandi, no solamente p'e, sino pa San Nicolas completo.

Durante e entrevista, e ta enfatiza cu renovacion di Bernardstraat ta cuadra cu e Plan Sasaki pa San Nicolas, bao di cual e terminonan di e prestamo ventahoso cu el a haya di Caribbean Mercantile Bank, tambe ta cay.

E ta manda palabranan di gradicimento na CMB pa su ayudo, na Pensioenfond di Aruba, na Benkie Fowler, kende a hiba e negociacionnan pa WEMA, y alavez na oficina di notario Croes.

Finalmente e ta trece pa dilanti cu semper el a kere den San Nicolas y cu e ta contento cu porfin ta mira e fin di e tunel.

Bernardstraat 101 tabata para bashi desde 1994, tempo cu WEMA a verhuis pa Trompstraat.

Dia pa dia, e edificio tabata bay mas atras, no obstante e constante esfuertonan cu WEMA tabata haci pa mantene.

WEMA a verhuis na 1994, entre otro, debi na e cantidad di bishita di ladron cu e tabata haya.

Na un dado momento, ladronnan tabata dreña e lugar casi tur dia.